أحمد هلال محطة خوف أشعار بالعامية المصرية الطبعة الأولى ٢٠١٨

بطاقة الكتاب

: محطة خوف

عنوإن الموَلَّف

: أحمد هلال المؤلف التصنيف

أشعار بالعامية المصربة

رقم الإيداع 2018-11178:

الترقيم الدولي 978-977-6656-16-1

عدد الصفحات

رقم الإصدار الداخلى: 102

تاريخ الإصدار الداخلى: يونيه 2018

تصميم الغلاف والتنسيق: الشاعر محمد الساعى

جميع حقوق الطبع والنشر محفوظة للمؤلف، ولا يحق لأي دار نشر طبع ونشر الكتاب الابموافقة كتابية من المؤلف



إهداء

إلي من ذكراها في وجداني ولاتفارق خيالي ليل نهار اهديها كلماتي لعلها تقرائها وتعلم ما في قلبي لها

أحمد هلال

على سبيل التقديم

دكتور صلاح طاهر

محطة خوف ... هو الديوان الاول بالعامية للشاعرالمرهف الحس .. احمد هلال من مدينة دمنهور بحيرة ..بعد القراءة الممتعة في هذا الديوان اتى الديوان فيما يقارب 100 صفحة إذ يحتوى على عدد 25 قصيدة متنوعة تنوعا كبيرا وعلى الرغم من ان الديوان هو تجربة أولى للشاعر الا انه جاء ناضجا قطفت قصائدها في موعدها تماما فجاء عفويا فطريا بسليقة الشاعروالتي

دعمها بموهبته المرهفة ... فتباينت قصائدة وتنوعت في

موسيقاها الشعرية تنوعا كبيرا

وقسم الديوان الى اربعة اقسام رئيسية منها المربعات... وكذلك الموال والقصيدة العامية والأغنية من حيث التصنيف وذاد عليها من وحى روحة الخلابة هذا وان دل على شيء انما يدل دلالة كافيه بان الشاعر خبيرا بتلك المناطق الموسيقية الرائعة وخبيرا بخفاياها بين ماهو جائز وما هو مستحسن ومالا يجوز لم يستخدمة فقد صقلت موهبته بالتدقيق والملاحظة واكسبته

ثقة كبيرة تزيد من شاعريتة وكسرت لدية رهبة الكلمة الذلك إتسمت قصائدة بالسلامة الموسيقية الشعرية فقد كتب من ((الرجز والكامل وكتب ايضا من الوافر والهزج وكذلك كتب من المتقارب وكذلك الرمل بحسه المرهف وكتب ايضا من المتدارك وكتب من البسيط)) وله محاولات في الجديد في موسيقي شعر العامية والتي مازلنا نحاول التأصيل لها واشكالها المختلفة من خلال البحث المقدم في مؤتمر شعر العامية باشمون سنة 2017 وكتاب الزجل والزجالين عن وكالة الصحافة العربية ناشرون وكذلك كتب المسحراتي في ابهي صورة والتي اذا ماقرأتها بتتعرف على روح وشخصية الشاعر وقضاياه من المجتمع .

فجاءت قصائدة متنوعة تنوعا كبيرا . ومن الواضح جدا المشروع الشعرى للشاعر وهو يحمل هموم وقضايا الوطن بين جوارحة وكذالك من خلال الفاظة وكلماتة من الممكن ان تتعرف عليه كشخصية مصرية صميمة فكانت نشأة الشاعر في طبقة كادحة ومتوسطة جعله يحمل من هموم الوطن الكثير والكثير فهو ينتمى الى الجيل الذي تعلم في بلدة ولم يجد الفرصة للعمل واتجه للقطاع الخاص وعلى الرغم من قساوة الحديد الذي هو استاذة تجد الكلمة بها طراواة ولين وكأنه يخرج لسانه للحياة القاسية على هذا الجيل في هذا الوطنوعلى الرغم من شعرة

والذى يتسم بالطابع السياسي أحيانا إلا انه تجد لدية الجملة الشعرية الشاعرية والتي تتوالى الصورة لدية بشكل مذهل متواترا متلاحقا ليشعرك بانه يقاوم في كم كبير من الفساد المتراكم في بلدنا الحبيب الا ان الديوان يتسم بتلك السنين الماضية المنصرمة والتي انطبعت على ديوانة الا وهي سنوات ثورة 25 يناير وما بعدها تجدها حاضرة في الغالب من القصائد مابين الدعاء لهذا الوطن والامل في غد مشرق ومدى تمسكة بالقيمة والاصالة بل وتدينة وارتباطة بتراب هذا الوطن وتمسكه بالقيمة التي تصب في مجرى النهر القيمي للمجتمع من خلال الشطرة الشعربة له والتي تتضح منها نشأة الشاعر الرائعة بما تحتويه من خصال كلها مستمدة من روحة ومن ارتباطة بدينة وبالقيمة والاصالة والشهامة رغم الهموم الكثيرة التي يحملها على كتفه من طبقته التي يعيش فيها والتي تظهر هم اول في حياته في ما كتبة من قصائد وكذلك الموال والذي تميز به

انه الشاعر احمد هلال هذا الشاعرالمتميز في عمله الاول بابداعاتة من خلال الصورة المتميزة والابداع الحقيقي ...اليكم ديوانه....

ضل المسافة

جوا مني كام سؤال بس مش محتاج اجابه احتمال احساسي خان لما فكر انی اه میت صبابه واني سهري كان عثىانك اصل قلبي قلب زايد ف الطيابه انتي يا ضل المسافه وهم كنتي ولاحق راسمه قلبك ع الطريق شاكيه من غدر الصديق بحرك انتِ كان غريق

قلت اعوم جواه واعافر يمكن ألقي ليكي بر التقيت حبك دوايا والدوا ليه طعمه مر قلبى قالى مرة دوق طعمه متغير في حلقى! خلى فكر الليل بيسرح واسئل النجمة اللي جاية كان سؤال عشمان وحابب إية يغير في الحبايب ؟ إيه يخللي الطعم مر..؟ طب یمین منی الیکی وللا نظرة من عنيكي وللا لمسة من ايدكى كان سعتها حاسه إيه. ؟

وللا اسمى جه ف مره غلطتى فيه وللا يلمس شعرك منك طب وليه كنتي قبله تسمحي لي اجدل الشعر اللي سايب بين ايديا وفوق كتافي حضني ليكي كان حنين حضني ليكي حضن دافي احصد الشهد اللي سايل فوق طريق المستحيل من غرامنا وبين شفايفك كنت شايفك ملك قلبي وبس ليا التقيت حبك مشاع

بين حقيقه وبين ضياع ليه حنين العمر ليكي فجأه يتحول خراب ليه كدا وانا قلبي داب رغم دا انا قلبي حبك قلبي مش ناوي يتوب او يغيب ف دقيقه عنك جينا تانى للسؤال ناقصه بس اجابه منك لسه قادره تعشقيني ولا ناويه تزيدي عندك طب كدا عينك ف عيني هيا هتقول اللي عندك

كنت خايفك

كنت خايفك

كنت بهرب من حكايتك

قلت ابعد يمكن انسى

التقتنى ف بعدى عنك

جنب منك

والخطاوى راجعه خلف

الف ذكرى تدور ف راسى

كنت بفرح لما يحكوا كتير بأنك

لسه عشقاني بكلك

والحكاوي في سطور العاشقين

بس عنك

ياللي سنك لما يضحك

تضحك الدنيا معايا

والغناوى والموسيقي جات بفنك دا لانك / لسه ساكنه القلب جوا الف مشرط للطبيب مش هيقدر ع اللي زيك لو هيقطع ف وريدي يلقى دمى هو دمك وانتى ليه بارده ف مشاعرك كل همك / هما كام كلمه ف جواب قلتي فيهم اه بحبك ولا صوره جتنى منك كنت ابات نايمه ف حضني واشتكيلها تقوللي اسامكك بلقى نهر دموع ف صورتك اقعد احكى ليكى عنك يجى صوتك من بعيد

اسمع الرد ف وداني انت روحي ونور زماني ومش راح ابعد تاني عنك كنت اصدق الف كدبه تكدبي بيهم عليا واللي بيا /هَمَ زاد وكتير اسيا وانتى شاطره يا قويه تجرحي ولا عدش ديه يظهر انك لسه مش عارفه اللي بيا وان ليلي زاد شويه عن ليالي العاشقين المغرمين / الحالمين النهار عندي بيفتح لما بسمع كلمه منك

لما شوفتك

علموني ودربوني ازاي اعوم ایه یغرقني ف بحرك رغم رجلی یدوب ف شطك

كنت خايفك !

كنت خايف ..! من عيونك من رموشك والشفايف

كنت خايف ميتك لامترونيش

كنت خايف اموت ف حبك

ولا حتى إني اعيش ..!

كنت خايف من لقاكى

ولا قلبي لما يتعلق معاكي

قلبي عارف انه ضعيف

لما يتشعلق ف خيطك وهم

يطلع ف الرديف

كنت خايف سهمك انتي كنت عارف موت انا هيكون بسببك شوفتي ليه انا قلبي خايفك رغم دا كله بحبك مش راح اقدر يوم افارقك

الحلم

مابين التوهه والغربه سنين العمر بتعدي بتغزل م الوجع سكه ولا تهدي وتوب الحلم بات مقطوع وأحلامي مهيش ف الطوع ولو عيني صالحها النوم أشوف كوابيس وانام دمعی علی خدی وفرشى صار ماليه الشوك ولا الدبابيس ولما إتهد مني الحيل لقيت الشمس طله هناك وأنا بتخيل إنه الليل

وشجره كبيره بتضلل علي الجنبين وصوت الزقزقه يسحر وكله حنين ونور هالل مع الموجه بيتحول بفعل غريب ووضع عجيب لشيء ساحر وكله جمال ولفة عود... تقولش غزال ورمش كحيل سهامه بتعلن التسليم ولون اخضر كما البرسيم دا ساكن جوا نني العين جمال السحر والتنويم كا نسمه فجر بتعدي ف عز الحر بتندي عروسه من بنات الحور

وألف وأدور وصوت بينادي وبلهفه تعال وكون هنا عندي وأطلب أد ماتطلب يكون حاضر هنا ف الحال زكايب مال دهب وياقوت دهب وياقوت قصور من نور ومتحاوطه بألفين سور بقیت مش قادر أتكلم ف نومی هادی ومسلم كتير من ليلي بتظلم وفكري يروح وبيودي على اللي باستنى من خدى صحیت م نومي متحیر لقيتها هناك وانا وحدي

صباحك ورد

وقالتلى صباح الخير بصوت يشبه كمانجه وعود لقيت قلبي معاها يطير كما العصافير بشوفها ملاك ف منظر طير بيبدر خير كدا ويجود صباحها كان ماليه الشوق بكل الرقه ويا الذوق معاها الدنيا حالها يروق تنادي الفرح تانى يعود صباحها كان ميلاد الشمس صباح فيه الحنين بالهمس

بس اللمس مش موجود اکید انی کتیر بحلم وعينى ف يوم مشافت نوم وبستنى الصباح منها كشربة ميه يوم الصوم وهي بخيله ف صباحها وبتزود عطش محروم ولما لقيتها بتسلم وبتصبح جناین ورد بتفتح وصوت كروان بيسبح وفكري معاها راح يسبح لنظرة عين .. تضخ الدم جويا وف الشرايين وقلبى بات ومتحير فقرر انه يتغير

ویصحی یقوم
یکلمها بشوق جواه
بأن صباحها هو حیاه
یهل النور مع صوتها ومایخبی
یاریتها لو تکون جنبی
صباحك ورد یاقلبی

فدادین بوار

فدادين بوار والزرع عكس المحتمل

نزرع خضار

الارض ليه كان طرحها كله مرار

ف بواقي ليل كله ملل

والبذرة رافضه الانصياع

حاسه بخلل

ازاي تكون هي النواة

لحلم مات جوا الحياة

من قبل حتى ما يكتمل

متحسبوش عمري بسنين

عدوا الجراح .. كام جرح

قرب يندمل

لسه كتير والارض بور

حتى القمر مكسور حزين

مستنی نور

او حتى دور اخر طابور

الميه زايدة ف العفن

والطعم مبقاش محتمل

ايه العمل

والظلم راسخ فوق صدور الخلق

والحلق شقق م المرار

مبقاش له صوت

مكتومة صرخة لنتظار

والجسم صابه الانهيار

برك الجمل

بس الاكيد

ان الحياة لا تحتمل وبقينا فيها كيف سمك الكل بمصالحة انهمك هو الضمير ليه كفنوه والحق ف الانعاش خمل معقوله تبقى دي الحياة مفهاش ولاطوق للنجاة يا منتهاه حلم الجدع دا العمر قرب ينتهي بالمشتمل ولاعدش باقى غير سكات لو تشطبو عمري اللي فات لو تسترو كل الرفات طرح البواقي يكون كمل او ترجع الارض الشراقي تكون خضار لو بالامل

الدور عليك

الدور عليك

بعد اللي حاصل ف الوطن

من بكره توبك يتِبِّدُل .. يصبح كفن

وتعيش ما تلقى حضن دافي يسترك

معدش غير حضن التراب

مع انه مليان بالعفن

الدور عليك..

متقولش دا حكم وقدر

كان فين جنابك لما نادى عليك حجر

أمسك بأيدك جمر جاي من الغضب

انفض وثور.. شعللها نار هما الحطب

عز الطلب .. لو مره قهرك ينفجر

الدور عليك

تطحن بواقى العمر ف رحاية الزمن وعصايتك العوجة هجص ماعدتش بتخوف غنم الدور عليك لما تدور ف سواقي تطحن حضرتك واللحم مرمي ع الطريق وقت المحن يابو قلب مابيعرف حنان يامفرق الدمع اللي كان علشان نلاقى لقمه حاف ولا عادش فرح يلمنا

ولا عادش فرح يلمنا يروي سنين كانت عجاف وانا مش بخاف من ليل ظلام شبعنا ياما م الكلام تشجب وتنكر ايه يفيد

ف قرار وواخده عميل غبي

ان اسرائیل تأمر تسید

على مسرى سنيدنا النبي

الدور عليك

تطلع عنيك .. ارضك تضيع

قدسك يضيع .. شرفك يضيع

وفاضل ایه یا أمة عایشه عمرها

كل اللي باقى ف حلمها

ازاي تراضي عدوها ف قضية (التطبيع)

امتى نفوق .. يا أمة ضيعها الهوان

يا أمه عايشه ع التاريخ

وبتبكي ع المجد اللي كان

ماعدش خالد اوعمر ..

ولا اتولد بيننا صلاح

ومادام عشقنا الإنبطاح ..

يبقى اكيييييد.. الدور عليك

إنت مين ؟؟

انت مین ؟؟؟ نفسي اعرف انت مين طب ودينك .. اسمه ايه لو آلهكم رب تائي غير آله العالمين قول لي يبقى هو مين ؟ اوقول لی ف ای دین مین سمح بالدم مین اللي ولع ف الكنايس والجوامع مین ف دم ولادنا بایع غير شيطان مجنون رجيم نفسى اعرف انتو مين ؟

انتو عايشين الحياة قتل ودمار كل واحد فيكو مليان بالضلال بتسودوا لون النهار يبقى ليه الكدب فيكوا وتقولو احنا مسلمين !!! اصل النفاق من طبعكم وغلبنا والله ف وصفكم هو انتو ایه بقی صنفکم لا استحاله تكونو من جنس البشر انتم اكيد جنس الوحوش حتى الوحوش مش طبعها ولا عمرها

تغدر بحد ف جنسها

تلقى المودة والمحبة وسطهم وحنينين

اما انتم والله مأجورين

تضربونا بالقنابل

تقتلونا بالرصاص

بكرة يطلع الف راجل

ياخدو بالتار والقصاص

الخيانه دم جاري ف قلبكم

غدر فرض ف شرعكم ...

نلقى منكم كل خاين او جبان

جوا ف بيوت ربنا

ولعها نار

فين ضميرك لما ضيعتوا الامان

تقتلو ف ولاد يصلوا

فاضل ایه معملتهوش

كلكم مع اللي ضلوا والسلام مبتعرفوش انتو اصلا مجرمين حتروحوا فين من ربنا وقت السؤال لما يسألكم قتلتوا المسلمين ولا المسيحي لما صلى بمعبده الكل عنده آله كريم وبيعبده بس قو لى مين آلهك يبقى مين ياللي مش بتخاف آلاهنا قول آلاهك يبقى مين

حلم فاشوش

وف ركن بعيد ع الايد والعين كركيبي إدارت جواه وفضلت كتير مابقربلوش ولا فكري بيروح له سنين كنت اقنع نفسي بان الموجود فيه انا معرفهوش

اوراقي وصوري واحلامي محبوسه ف ضلمة ايامي

مع ذكرى شريط انا ماسمعتوش

والصورة الموجوده هناك وسط الكركيب

على رف شايلها لوحديها

مش عاوز عين تنظر ليها

ولا تعرف مين موجود فيها

اوایه منقوش

ع الصورة الموجوده هناك وبأن الساكن فوق الرف

كان اصله ملاك

واتبدل صورته بقى انسان

من جنس وحوش

وسمعت الصوت المعتاد

ف ودائی وف کل معاد

وكأنه شاكوش

بيدق ف راسي واحساسي

قوم خرج م السجن الصورة

كلمها واحكيلها شويه

عن حالك ايه اللي جرالك

مين غير تاني ف احوالك

وازاي حبك فجأه اتحول

اوهام ورتوش

قربت هناك عند الكراكيب جنب الشباك

ومسحت تراب العمر هناك

خرجت الصوره من البرواز

ولقيتها بتضحك زي ماهي

والوش بشوش

رجعت ايامي المنسيه من فوق الرف

وفضلت ادور على نفسي,,

وكأن العقل الموجود فيا اتجن وخف

كلمت الصورة ف اديا

بكلام انا اصلا مافهمتوش

ولقيتها بترد عليا

قرب ياحبيبي وتعال

احضن اشواقي بعيونك

دنا قلبي ياماعاش لك مخلص

عمري ما فكرت انى اخونك مدت لي ايديها وحضنتني والقلب مسلم واهو فاتني والرمش ف عينى مابهزوش وحكينا عن بكره وبعده وامبارح واللي خان وعده والصوت جوانا بقى يعلى مافی حد یحوش ولقتني بفتح ف عيوني والصورة مسكاها اديا اتاريني نايم وانا بحلم والدمع بيجري ف عنيا الحلم كان صعب عليا لكن ف الاخر ياخواننا كان حلم فشوش

نقطة رجوع

ولقيتها واقفه ع الطريق نفس المكان ياااااه ع الزمان كنا بنمشي والأدين متشبكين

والقلب كان دايب حنان

بيشعلل الأشواق حريق

وانا ف الطريق / ولمحتها

واقفه تبص وتلتفت

وأنا من بعيد

شايف أديها بترتجف

نفس المكان بس الزمان

من كام سنه

كان صعب يرجع عمرنا هي وأنا

قصه كبيره ما تتوصف

لو فات عليها 100 سنه

كنا ننام نحلم ببعض

وأتمنى ليلي يفوت قوام

علشان ثوانى تضمنا

وتلمنا الايام ف حضن

ونرتب الاحلام مابينا وتترسم

ضحكة عيون المشتاقين

لحظة لقا

والفرحه تيجي مزوقه..

من فوق شواشي الامنيات

والذكريات ...

دي بحر موجه ماينتهيش

والمستحيل تبقى ف يوم .. مافيش مهو أصل أحلامنا كتير

بنكون سوا

يجمعنا نفس طريق حياتنا ف الهوى ننزع خيوط الفرح من فك الزمن

ونشدها ..

ولقيتني ماشي لحدها

قربت أكتر منها

وسمعتها بتنده باسمي

وعيوني من كتر اشتياقي دمعت

ولقتني فجأه بروح لها

بس الزمن اغتال ف لحظه

كل حلمي من سنه

لما . سمعت . بصوتها . اسمي

جري عليها ابنها

وقفت نعم فوق اللسان مهو أصل متعود أنا ردي بحنان ورجعت تاني والعيون أهي لسه جواها الدموع سكنت عيوني من زمان هي الدموع وبلاش تبان خبيت أنا نفسي كمان ورجعت تاني م الطريق وأنا وحدى في نقطه رجوع

محطة خوف

وسكة توهه ماشينها

تزيد الجرح ع المجاريح

وارض شراقي بتنادي

على التفاريح

وعود ناشف وبيعافر يكون اخضر

بتتسرسب سنين العمر

سواد الشعر متغطى بتلج ابيض

وقلب حزين

واضعف من جناح عصفور

ولو فكر يعادي الريح

مع المجاريح بعيش دايما

بليلة غربه قتلانى

دنا الموجود ف وسطيكم

وليه الدنيا نسياني وسيبانى لتوهه معدش منها رجوع حروف الشعر عصياني وكتبانى يادوب تلميح بتوصف فيها احوالي يقولوا عليا بيمثل وطوالي بتنزل دمعه كيف تماسيح وانا اللي بواسي ف دموعي وعشقي للقلوب تسابيح يعدي ليل ورا ليلي مفيش ف العتمه حق صريح وایه باقی من العمر اللی راکب قطر وكل محطة فيها الوف محطة غدر معروفه وبعديها (محطة خوف)

نشوف بعنيهم الحيره! مفيش غَيرَه وكله جاي بس يشوف ويتفرج على القطر السريع جدا يلم ف كل خطواته بواقي العمر وباقي محطة ولا اتنين ؟؟ مهوش معروف

صوت الفجر

وصوت الفجر جاي يعلن نهاية غربه جوايا واهو معايا الحنين بايت وبيقطع بواقي الليل معاه الويل انا عشته ووعدي لسه ماشفته كأن الوعد مش مكتوب يجوز العمر مش كافي لقصة فصولها بالمحسوب وصوت الفجر بيقرب وانا بهرب ويدخل جوه ف العتمه خلاص مصبحش فيها نهار

منا تعودت ع الضلمه وبلضمها

ف سبحة عمري حباية ورا حبه يا سكة وراجعه خطاويها ياقصة وحرفها موجوع وعشق الليل بقى تاشيرة للدمعه ومش سامعه

انين القلب من شوقي دانا العاشق سواد الليل ولون الفجر ف عيونك ومين غيرك

يساعد قلبي ع الدقه يجري الدم ف عروقي وتجي النبضه تشتاق لك وتندهلك

وانتى ساكته مش سامعه ورافضه لقلبي حق رجوع وشايفك جوا فنجاني خطوط ترسم طريق لحياه تجمع شملنا تانى وننسى الاه واي فراق كتير بشتاق اشوف فيكي النهار مره وهفتح باب لصوت الفجر يصحي الشوق وهدعيلك تكوني نسمة ويا شروق يهل النور يبان الفجر على ايدك

الأراجوز

خيوط الوهم بتحرك معاها كتير تمرجحنا تشقلبنا مافيش تقدير وانا قلبي اهو مربوط بخيوطك كما (الارجوز) بتلعب بيا علي المسرح عشان جمهور يصقف ليك تكون لك فرصه ف التصوير اداري دموعي جوايا واشوف عشاق كتير حواليك ومش من حقي اي كلام ولا تبرير تحرك كام صباع ف ايديك بتجبرني اكون فرحان واغنى الهم وانا جوايا حزن كتير ولا تسأل ولا تهتم

وليه تهتم ..؟

ماناارجوزيقلب قماش

معاك القلب مات مش عاش

تشد بقوه ف خيوطك

تحركني على الجمهور

الاقي وشوش وهي ديكور

اشي بيضحك واشي زعلان

وحتى الصوره لو تشبه بني الانسان

لكنه بقلب متحجر ما فهش ضمير

ولسه كتير من الجماهير

بتتفرج علي الارجوز

ومش ممكن ولا حيجوز

ف تفكيرهم

امثل تانی ف روایه

يكون فرشي ك ريش نعام

ولبسى حرير

واعيش عمري بقلب اسير

ومتغرب مابين قصه بتتمثل ودورى فيها سطر يجوز وهى البطله لو هتعوز تدوس على قلبي وزياده بدون تفكير فقررنا يكون الحل كالأتي مفیش جنازیر وهقطع كل خيط مربوط بيشنق روحى من قلبك ومش راح اكون حبك وهخلع بدلة الارجوز بكل ثبات منيش مهزوز تعبت كتيييير وهعلن ثورة التحرير

أحمـــد



أهين يا أحمد ياروح القلب من جوه ياواخد عقلي ف الملكوت مخلي الروح كما النوه وآآآآه ياأحمد ماعدش فيا من قوه وحشني ياضله وناسه وخدي منتظر بوسه ومن أديك ولو دوسه

وخايف ييجى يوم عيدك ماكون جنبك وبحلم بيك بتندهلي ياجدو قوم وروح هاتلي أقول شاور ياروح جدو ولوحتى 200 لعبه دي كل الدنيا بتحبك تقول هاتلى كمان عجله ومسدس يكون له صوت وعربه النقل تجري تفوت وأكون فرحان منا عمرى لقيته معاك وبجري وراك وقلبي يدق من جوه بيعزف لك كمان غنوه عشان أنت نسيم ف ربيع وعود أخضر وطفل وديع

وسبحان الذي سواك جميل تقاطيع وف عينى تكونلى ملاك أهين يا أحمد وفين أنت ياروح الروح ياشاغل فكري فين ماروح وماما عامله أيه وياك أه يا أحمد وخايف من طلوع الروح وعيني تبات ماهيش شيفاك د أنت دوايا تشفي جروح وأنت الذكرى من بعدي وفيك أنت يطول البوح يا أجمل طفل ف الدنيا ومنه المسك دا بيفوح وليك أنت يانور عينى بیصبح کل شیء مسموح

تعاكسنى .. وأيه يعنى تشد ف شعرى وأيه يعنى وتركب أنت فوق ضهري اقولك ضهرى كان ملووح وطاب منك ياروح جدو أهين يا أحمد ياضليايه ف عز الصيف ربيعى وكان ربيعى خريف ياورده نديه بتفتح وعودها ضعيف يانوارة سنين عمرى وكل البيت ولما جيت .. قلبت الضلمه صبحت نور صحيح إني بلف وادور وبسأل فين حبيبى فين يرد الجرح جوايا سؤالك عنه مش مسموح و آآآآآه با أحمد

البنت ساره

والمفتتح طاقة امل فقلب حاره بتشتكي وجع السنين ويا أسماعين مع عم عيد وفجر هالل من بعيد تلقى القلوب متحيرين وصوت هلال الفجر بیکبر آدان من فوق شواشى الحلم والامل البعيد بنجري ع اليوم الجديد والشيخ سعيد واقف علي باب النجاه

ينده بصوت كله حنان هز القلوب ويعيد كمان فين اللقا ياموحدين یا مصلیین وروايح الفرن القديم عيش الغلابه المطحونين وبشاير اليوم الجديد البحر موجه ليه عفى والحر اهو بادي شديد شبابيك حارتنا اتفتحت واشمعنى شباكها العنيد مقفول بقفل وييجى100 ترباس طب لیه کدا بيموت الاحساس والمفتتح هو الحياه

ف قلب شاب طیب رزین حلمه يشوف نور القمر بس القمر دايما حزين مقفول عليه ب الف باب ياعم يابتاع الامل!! سجلتنا ليه ف الغياب ؟ الحلم ليه مليان عذاب ؟ حتى الولد هاجر بعيد!! من ظلم مكتوب ع السنين لما الامل اصبح سراب بقت الخطاوى مكتفين حتى عيون الخلق نامت والقلوب بقوا عميانين ياعم يبتاع الامل أملك سراب طب واحنا ليه متعشمين تاهت خطاوى سكتك متقول... رايح بينا فين

الشطاره

الشطاره

لما تكتب حرف يبقى جديد عليك ولا ترسم صورة ماشفتهاش عينيك ولا ترسم صورة ماشفتهاش عينيك ولا لما تلاقى روحك تيجي جنبك تنصفك وأما علي حقك تثور عمر شئ مايخوفك وأما من قلبك كمان .. تبنى للحب مناره تبقى دي هي الشطاره والشطاره

لما تفتح للأمل كام باب صغير وسط حاره وأما بيتك يوم هيكبر لمتك كل الحبايب جوة منه تلقى أحضان الدفا واللى يسأل ع اللي غايب واللى نام جواه أمان حتى لو.. غطاه شيكاره والشطاره

لما تتعود خطاوى لمسجدك شكرك انت نعمته لمحبتك أما تذكر ربنا وقت الرخا ربك انت ينصفك في بلوتك أو تمد الايد بخير في دنيتك تلقى كل الناس في سيرتك كان كلامك بالبشاره

والشطاره

انك تكون عرقان شقي على لقمتك تلقى توب الستر يستر جتتك خد كلامك جوة منك قلب يرحم مش يكون كل الكلام شخط وأمارة والشطاره

لو بجد تحب وطنك وأما تزرع خير فى بلدك وأما تمسح يوم دموعها لما تحزن وأما تحمى بجد عرضك لما ترفع يوم علمها تكيد عدوك أما لو صابها العدو وأداك فى ضهرك مش هتبقى يوم شطاره يبقى يا مليون خساره يبقى يا مليون خساره

أمي

مهما قالو وكتبو عنك الكلام مهيوفي حقك أنتي أمي وأنتي عمري كل كلي تحت رجلك أنتي سكه لحسن ديني أنتي طوق مايوفي ديني نوربيضوي جوا عيني وف غيابي ياما عنك كنتى صابره كتير عليا صرت من بعدك ضحيه لسه ياما كل حاجه بفتكرها بفتكر كل الساعات ضحكتك انا لما كنت بضرب اخواتي البنات

کنتی بتقولی دا راجل ربي زيده ف الثبات أيوة بدعيلك يا أمي تسكنى الجنه ونعيمها تشهدى بالله في قبرك وف ثبات فاكرة ياما لما كنت عليكي بجرى تفتحى حضنك أوام وتقوليلي نام ف حجري حتى لما كبرت حبه كل حبك زاد ب حبه والمحبه لسه ياما عايشه جوة الروح تبات وسط أحضانك خديني آه ناديني

يابن بطنى وحته مني قلبي شافك قبل عينى قولي ياما إزى حالك قلبي عندك بيناديكي حسله بيا

أني عندك جاي أبات جاي جايب لك بخور حتى قبرك زاد ف نور أنتى ساكنه الجنه ياما طب ولیه زایده حلاوه قلبى شافك مش بعيني مبني سور بينك وبيني بس شايفك بين ملايكه جنه فيها انهار وحور وأنتي وسطيهم جميله وش أبيض عين كحيله نور ينور كل ليله

تشربو م الكاس تدور ذكرياتك حلوه ياما فكرتني ايام زمان رجعتي والضهر يدن فى يدي لوح ويا الكتاب يبتسم وشك ويدن تفتحيلي الف باب انت ياض ياحمد حبيبي شوف هدومك والتراب والله حلوه الذكريات لسه ريحتك جوة بيتنا ع الجدار أهي قاعده صورتك والعلامه وضحه ياما فوق ف قورتك لسه وسط الطرقه واقف في أنتظارك

لسه طيفك وسط دارك لسه سجادتك بتبكى وسبحتك لسه جلاليبك بتحكى محبتك لسه ياما وداني سامعه خطوتك وإنتى جوة الليل تدبي وإنتى ف التسبيح تحبي تفرح الميه ف إيديكي والوضوء بالنور يزيدك وتناديني قوم بسرعه الفجر قرب صلي يابني جوة نومى أروح مخبى عيوني وإنتي بتيجي جمبي وضحكتي تسبقني مني وأترمى ف حضنك يا أمى والله وحشاني ياعمري تعرفي إن الشوق كواني

نفسي ارجع طفل تاني نفسي بس أبوس إيديكي نفسي أبيع العمر كله لجل نظرة من عنيكي لجل لمسه من إيدكى فوق جبيني لجل ياما نظره تشبع فيها عينى نفسى ياما ف كل حاجه بس عارف روحتی منی لو تجيني جوة حلمي بس أشوفك وتناديني

إنسيه ولا جان

هو انتی مین یاتری أنسيه ولا جان سبحانه من أبدعك خلق الجمال الوان الوش زي القمر والخد كيف رمان الرمش يسحر بشر والننى فيه بركان ریقك دا میه زلال تروینی لو عطشان عطرك يشد الروح ياسمين دا ولا ربحان شلال هواكي قدر والحب فيه طوفان

حاسس بإني الملك والكل فيه طمعان اصل الهوى ف القلب صننع الإله سبحان خايف كدا بوصفتك الوصف كان نقصان اصل الجمال يوصفه شاعر وكان فنان محتاج انا معجزه تثبتلي بالبرهان ان الجمال دا بشر عاش وسطنا انسان

بياع الحلاوه

وبصارع نفسى وباتحمل لاجل انی اعیش واربي ولادي من عرقي مش م البقشيش مع ان الشغلانه بسيطه ومهيش هيا كلها تلطيش بس اعمل ومفيش غيرها والدنيا دى صعبه ف احوالها واهو كله والرزق على الله شغلانه ومش بخجل منها بسرح بحلاوة وزماره وف ايدي عصايا ومتعلق فيها الاكياس ادخل من شارع للحاره

يتلمو الناس

وابيعهم سكر من ايدي

وانادي أأمرني ياسيدي

أمرك ع الراس

يطلع واحد من وسطيهم

يصرخ ويقول دا مفيش احساس

زمارتك عاليه وبتزعج

وتصحى الناس

وانا اصبر نفسي وباتحمل

علشان البيت لازم اكمل

وازمر تاني بزمارتي

يجيوا الاطفال زي الكتاتيت

ارضيهم واضحك ف وشوشهم

لو حتى اسيت

ف الاخر اجمع ما جيبي

حبة ملاطبش

لا يجيبوا الاكل وكرامه لو جابوا العيش دنيا ودواره وغبية كلها تناتيش وبعافر فيها وبتحايل كان لازم اعيش علشان البنت هتتجوز والواد ف الجيش والواد ف الجيش نتلموا ونقعد نتعشوا والضحكه الصافيه ف وشوشهم

ولا نحقد ع الناس التانيه ولا نشكي غير للي خلقنا ونقول معاييش

> ولا حتى معاش يسند حالنا ولانظره تغير احوالنا عايشين وياهم وكأنا

> > مش بنی ادمین

ويهل الفجر بمواله وبدمع حزين اسرح من تاني بعصايا وعليها اكياس وف ايدي التانيه اهي زماره من غير احساس

جرحك مِعَلِّم

يا شغلاني وتعباني ورافضه لو نعيشوا الحلم كأنك ناويه م الاول يكون الحب زى الفيلم انا طبعى ماليش ف الغدر وعايش يومى سلم ف سلم وكنت كتير ازور شارعك وامنى نفسى لو اشوفك وانتي ليه بقى ف شرعك تزيدي الجرح جوايا ومابيتلم وطعنك ليه بقى ف ضهري دى قهوة حيكم تشهد بطول سهرى وعينى هناك على الشباك ولما تطلى وانظر لك

داقلبى ينظ من صدري تفوتي جنبي تبتسمي اشوف النظره بتسلم والاقي الخطوه تسبقني وكل مشاعرى تستسلم بتيجي تقربي مني بتتشبك صوابعنا وتتكلم كلام ما تقلش م الاول ونفضل نحكى ونطول اعبي الحب والملم مشاعري تزيد وقلبي معاكي يتقوى نسيت بيكي بنات حوا سكنتى القلب من جوا وليه قلبك كدا بيظلم تبيعى الحب واحلامه وايامه تبيعي ذكري عشناها

علي شطك فرشناها وليه ردك بقى بيألم تقولي خلاص نسيت حبك ومش فاكره انا قلبك احسك جسم من غير روح واشوف صورتك ف عيني تروح ونورك بات كدا مضلم خلاص انسى وانا هنسى واطيب قلبي من بعدك ولو فاكره يكون لسه انا قلبي هيشتقلك حقولك روحي ياعمري دا جرحك لسه اهومعلم

كومبارس

ووخدانا الخطاوى لفين وفين رايحين بنتكفا ف مشيتنا ومین یمسك كدا ادینا ويفتح بس طاقة نور وليه السور بقى عالي مابين الحق والباطل وبيماطل على حقوقنا وراسم كل خطاوينا محدد فيها ان احنا بنمشي بس بالادوار ولا واحد يواسينا يحلي مرارة المشوار ويوعدنا بطريق اخضر نلاقى الحزن متحضر

فى فيلم نهايتة معروفة وواخد فيه يدوب حرفين .. من القصة وكل الناس اهي بصة منا الكومبارس ف الكواليس فى سكة مرشقة متاريس بتمنعني من الطله على الجمهور ومشهد ليا وبضهرى يادوب في الكادر وطعنة غدر يتنهى الدور مابين الليل ونهارنا وليه احلامنا مقتولة ومش بالدور يكون عيدنا بنكتب م الحروف الوان وهى الكلمة تكتبنا ياتسعدنا يا نشقى بيها ف حياتنا دموعى نازله وبتنعى سنين فاتت ومن عمرى

على عمري كأنه سيل بكل الويل قضينا بيها احلامنا ياسكتنا مع سكاتنا لفین رایحه کدا بینا وليه الكلمة مسجونة ومكبوته حكاوينا بقيد الصبر على بكرة نقول يمكن يداوينا ويومي رافض الفكرة وعكس ماكنت بتمني فهستنى يجوز تتبدل ادوارنا ونلقى بس ساعة نور تداوي فينا اوجاعنا

ما تعرضهاش

آجل ما بدأته ف احلامك ماتعرضهاش دا الحلم اللي بيسهل وصفه اهو مات مش عاش داری ف دموعك لو نزلت على اكل العيش أقبل م الدنيا تحديها ودا أيه فيها غير التنتيش دا الحزن معشش ف بيوتنا والفرح مجاش والدم السارح ف عروقنا ودا يوم موتنا ازاي يتحاش لساأني عبيط وف احلامي وبميل ع الشط التاني

كان نفسى اطير وابيع الباقي ف ايامي بحبة فكه او نص ضمير او حتى ف ليلي اكون خفاش او اعیش واکون هباش نتاش يمكن احلامي هتحقق على شط النيل وتعود الحلوه السنيورة بالشال والطرحة على القورة وتشوفنى تقول راح ولا عداش منا اصلي خيال مش باين دايما ف الصورة كفنت الحلم وأجلته والباقى منه انا موته جوا الانعاش كات صورة وفضلت قدامى و بالف دليل

احلامنا ام ضفاير سودة من لون الليل

مرسال الحب اللي فايدها اتبل وباش ولاعدش بيستر غربتها غير قطن وشاش

البندقية

جوه الامل ماشيين ندورع الامان ف ادينا كفه والميزان راح من زمان الحلم كان والابتسام على وش فجر نادى علي الليل القريب مستنى طاقه نور والنور مخاصم قلبنا بينا غريب ودا شيء عجيب متعشمین ف نهار یبان جوا القلوب العمينين ونقول لمين

يسمعنا مين لما الرصاص اصبح كلام للمجرمين لما النفوس أتعودت ع الزيف والكلمه سيف بتشق عتمة لنهيار الشمس جوانا نهار رافضه تبان وأنا مش جبان تايه مبين الازمنه رافض بقوه لنكسار يا أيها الحلم الذي مكسور جناحه من زمان

مبقاش انا فاتح بيبان قلب الهوى وانت محرم ع النَفَس

يطلع دوا بنشم ليه ريحة بارود والبندقيه ف ايد جبان

أما بعد

وأما بعد وبعدك إنتى مافى حد برغم إني تعبت كتير لقيت الراحه من عندك كلامي بجد ومن غير حد ... يفصلنا ولا مسافات بتبعدنا هتوصل ليكي اشواقي بكل الود وأما بعد عرفتك زي نسمة فجر ف عز الحر تشوفي الشوق وتداري تقولي مكانش على بالي

احب بجد

وشاكيه م الزمن والناس

مافيش احساس .. بيوصلك

يترجم فيه معاني الحب

ولو بالكدب

ودمعك موجة ورا موجة

من الحوجة ... لقلب يشد

وأما بعد

دي لسه الشرنقة كاسيه

محاوطاكي

وايدك ماسكه خيط (الوهن)

مع انه .. ضعیف جدا

وكان املك يناجيك

وياخدك للامان والبر

وكان مكتوب وكان الوعد

اكون السعد اداويكِ

اكون الشط انا ليكِ

اكسر موجك النازل على خدودك وكنت المرسى لحدودك ومش ممكن هييجي اليوم واخونك هكون حضنك واكون كونك تشوفي السعد وأما بعد

قُولى ليه .. ؟

أيه يابلدي عاوز أقولك هو ليه الكل هانك؟ وأنتي ليه ساكته ياغاليه هو مين لجم لسانك؟ هو ليه الحزن عشش! ولا ساكن بين جنابك! هو أيه خلاني ساكت ولاصابر غير جَنابك قولى ليه إنى بحبك؟ ولا دايب في حطانك هو أنا اقدر أفارقك أو أفارق يوم بيبانك هل عشان دمك بيجري جوه قلبي ؟

أو لإنى نبض عاشك بالألم من صغر سنى أعذرينى لو لقيتي صوتي طالع ويناديكي أعذريني اني بحبك بنتظر لمسه إديكي مستحيل أبعد يابلدى بعدى عنك فيها موتى مستحيل أسكت وأسيبك أصل موتك من سكوتى مستحيل أهرب يابلدي أه بقولها بأعلي صوتي دانتی حبك جوه غنوه تنعزف لحن ف حياتي دانتي صابره عـ البلاوي من اللى ناوي فيوم يزلك

أنتى طبعك أيوه صابره كله يعرف أيه حكايتك كلمتين بيني وبينك أنتى ليه كل القلوب متشوقالك هو دا لطيبة ولادك ولا يمكن لجل أرضك أولزادك نفسى أشوف فيكى سلامك نفسى أحضن يوم ترابك طرز الفرح ف عبايتك وأسعدك وأنول حمايتك قولى يامه هما ناسك ليه سابوكي وحرقو دمك؟ أحنا عاوزينك سعيده وهما سحبينك لهمك أحنا جواكي الغلابه أحنا منك

ياما عشنا كل غمك قلبي حسك أيوره حسك دأنتي جوايا ف عروقي أطلبيني هتلاقيني بين غروبي أو شروقى واللى طالبينه ياغاليه أنك إنتى فيوم تفوقي تعرفي مين اللي خانك ضاع معاه أبسط حقوقي أسمعينى أوام ياغاليه أفهميني حسی بیا و بوجودی أصل قلبي حته منك وأنتى محرابي ف سجودي

أصل لونى تراب لأرضك

وأنتى ترنيمة خلودي ياللي ساكنه جوه مني راسمه نفسك فوق حدودي أسمحيلي أبوس ايديكي وأمسحى الدمع ف خدودي وأبقي قولي إنى طيب حتى ف غيابى وشرودي بندهو يجري عليا عمره يوم مافارقنى ثانيه حرر الأرض بدماه يبنى ويعلي ف سدودي وأسمعيني يا حبيبتي حفضل أحمكي بروحي حتى لو كانت حمايتك فيها موتى

صباح الخير

صباح الخير على الجدعان على الانسان وعلي اسمه متسطر ف كل ميدان صباح الغربه والتوهه ف كل مكان صباح الخير يابلدي يانسياني وسيباني بقالي زمان

صباح الخير علي الجدعان علي الانسان صباح ممكن ومش ممكن على اللي عشته ف الشارع ومش لاقى مكان يسكن

وبطن ولاده بتصاصي كما العصافير عيشها ذل ف حياته وليه يتهان

صباح الخير علي الجدعان علي الأنسان على الأنسان على الاوباش وعل النتاش وعل النتاش وعل النتاش بلاش ف بلاش وخلى الجوع بيحصدنا ومبيخشاش صباح يمكن يكون فيه خير وييجي عندنا ويبان

صباح الخير علي الجدعان علي الانسان علي الانسان علي العرقان علي العرقان علي النجار علي السباك علي الحداد علي اللي طافح الكوته وعيشته سواد وضهره محني م الحوجه وهما جراد فلازم يمشي ويطاطي ويعمل فيها قال كسبان

صباح الخير علي الجدعان علي الانسان علي موظف وعاش غلبان ومادد ايده وبيسأل ياخلق الله وكل الحسره والحيره تبات جواه وحتى الفقرع الجنبين كمان سواه وضاع عمره علي التعليم

وف الاخر طلع خسران

صباح الخير علي الجدعان علي الانسان علي مسطول ومحشش وف التوهان وعايش ليل ف خماره وعايش ليل ف خماره وف نهاره مقضيه نوم مخلف م العيال اورطه واهي ديونه بقت بالكوم مخالف دينه وحياته مقضيها لا خير ولا صوم ومستهبل ومتبهدل ولا زعلان

صباح الخير علي الجدعان

علي الانسان
علي الجندي ف كل ميدان
وحلمه لو تفوت ليام
وينزل بس ف اجازه
بييجي من بلدهم خام
ويرجع تاني ف جنازه
اسمه يتوه مبين دول كام
وف الاخر ملوش عازه
وقبره يكون بدون عنوان

صباح الخير علي الجدعان علي الانسان صباخ الخير يابلدي وخيرك بس بيروح فين حرمتى منه ليه ولدي

وكسره بخاطره ويا العين ماقولتي ف مره دا سندي ولا ظلملك ف يوم بيلين صباخ الخير يابلدي ولسه عايشه في قلبي ولوعمري مايوفي دين اجيبلك عمر علي عمري كمان وكمان

محتوى الكتاب

2	بطاقة الكتاب
3	إهداء
4	على سبيل التقديم
7	ضل المسافة
11	كنت خايفك
16	الحلم
19	صباحك ورد
22	فدادین بوار
25	الدور عليك
28	إنت مين ؟
32	حلم فاشوش
36	نقطة رجوع
40	محطة خوف
43	صوت الفجر

 الأراجوز
 أحمد
 البنت سارة
 الشطارة
 أميأ
 أنسية و الا جان
 بياع
 جرحك معلم
 كومبارس
ماتعرضهاش
 البندقية
 أما بعد
 قولي ليه . ؟
 صباح الخير
 محتوى الكتاب